

de l'ixola, el che è confirmado per via dil Zante; con zonta, che se divulgava Hali bassà esser stà mandato su la Natalia contra Sophi, qual prosperava; et che Zelabin, uno di fioli dil signor turco, li dava favor.

*Di Candia, di sier Hironimo Donado, dottor, duca, et sier Beneto Sanudo, capitano, di . . . octubrio.* Avisano la nova sopra dita di Caramio, corsaro, notata di sopra; et esser stà esso capitano al suo synicha' in l'isola, *juxta* i mandati etc.

232. *Di Hongaria, date a Buda, a dì 16 dil pasato.* *Primum* el zonzer li a la corte dil secretario nostro, Vicenzo Guidoto, successor de Zuan Francesco Beneti, visto da la majestà regia con optima accogliencia. La dieta di baroni era finita, et ordinata l'altra per San Zorzi. *Item*, era seguita discordia tra i duo valachi, *videlicet* mondavo et transalpino, per uno, nominato Romano, che se volea far signor, per il che la majestà dil re havea designato uno suo agente per adaptare quelli. *Item*, era a la corte el prior di Lavrana, loco confina con turchi, chiamato per certo atrocissimo caxo per lui comesso in la persona de certa baronessa, con la qual l'havea contraversia et li havea fato tuor per forza alcuni instrumenti, et poi *crudeliter* fata amazar. Et era seguito, che andando el dito prior in castello, se li feze inanti i parenti di la dieta baronessa, con grande comitiva del populo, exclamando et implorando justitia contra quello; et se 'l non fosse che 'l fuzi in castello, l'havevano morto. La majestà del re el feze retenir et sedar el tumulto, et poi, formato processo, se giudicava el faria morir; ma che questa causa è stà differito a la dieta di San Zorzi. *Item*, erano a la corte quelli di Jayza, implorando subsidio per dubito di turchi, dicendo la Signoria nostra dà danari al re, acciò tengi ben custodita Jayza per difension di la Dalmatia, *adeo* la majestà regia volea proveder a la segurtà l'horo e in la Croatia.

*De Germania, di sier Piero Pasqualigo, dottor, cavalier, orator, date a Salzpurch.* Di certa dieta si dovea far li; et che la cesarea majestà havea ordinato di andar a Costanza, dove si faria la dieta, e poi andar in Bergogna per tutela di quel stato, et del fiol fo di l'archiduca, *maxime* hessendo chiamato con instantia da la Fiandra e Barbantia, al qual effecto haveano destinati a sua majestà 4 oratori, *videlicet* monsignor di Berges, monsignor Severe, che era gubernator dil fiol di l'archiduca, monsignor canzelier di Barbantia, et monsignor de Rochia, fiol dil canzelier de Bergogna. Et che in la proxima disciolta dieta, fata li in Salzpurch, era stà concluso, che sua

majestà *pro nunc* non passasse in Italia, per la corona, hessendo da poi la morte del fiol seguito le novità in Fiandra per el duca de Geler; et che sua majestà se poria incoronar in Germania, come *alias* altri imperadori hanno facto.

*Di Franza, di sier Alvixe Mozenigo, el cavalier, orator nostro, da Bles.* Avisa el Valentino esser fuzito da Medina di Campo di Chastilla, et zonto al re di Navara, suo cugnato. *Item*, che 'l dito re di Navara era stà chiamato al parlamento di Paris, per la differentia de quel regno con monsignor di Fois, *ratione prætensi feudi*. *Item*, che 'l duca di Geler, contra le tregue havea con fiamengi, conclusse per avanti, havia recuperato uno suo castello per deditione. *Item*, conferma la nova de la election di oratori designati a la cesarea majestà *pro tutela* dil stato dil fiol dil *quondam* archiduca. *Item*, era nova a la corte, di la intrada honorata in Napoli del re de Aragonia; et *similiter* de l'aquisto de Bologna fato per il papa.

*Da Ferrara, dil vicedomino nostro, sier Sebastian Zustignan, el cavalier.* La nova del Valentino sopraserita; et come il ducha si ha excusato con lui di quello è ditto per Venecia, che l'andò dal papa a mal effecto, dicendo non haver dato favor alcun al papa di zente, ni altro; et esser andato a farli reverentia e conzar la sua cossa di Cento et la Pieve.

*Da Pexaro.* Dil zonzer li di alcuni fanti alemani; et che 'l papa l'ha 'uto a mal, à protestato li lievi, *aliter* etc.

*Da Bologna, di sier Domenego Pizani, el cavalier, orator nostro.* El partir dil cardinal Narbona, francese, per Mantoa, se dicea per mutar aere. *Item*, che 'l papa havea celebrato el di de la sublimation sua al papato, et cantò la messa el reverendissimo cardinal Pavia, et cavalcò per la terra; et havendo visto, che a la via verso Ferrara *alias* fu una forteza, disse volerla far, *tamen* voria a spexe di quella terra, la qual cossa non piazea ad alcun di la terra; del seguito se intenderà per le altre. *Item*, soa santità è solizitato per letere di andar a Roma, *tamen* dil partir non se dicea altro. *Item*, come el cardinal Castel di Rio, parlando con l'orator nostro, disse la Signoria deva favor al signor di Pexaro, et havia fato andar quelli fanti alemani li etc. Et esso orator rispose: La mia illustrissima Signoria non va con questi mezi occulti, quando la vorà ajutarlo lo 'l farà *publice* etc.

*Da Milam, di Nicolò Stella, secretario.* Che domino Zuan Bentivolo, con doi fioli, era ad uno